

Recurrì tar l'istanza be cunter la SSR

Midada tar la represchentanza da la Rumantschia

■ (anr) Tar l'istanza da recurs independenta da radio e televisiun (Unabhängige Beschwerdeinstanz/UBI) è vegnids inoltrads l'onn passà 18 recurs – dus pli pauc che 2012.

Quels han pertutgà be programs da radio e televisiun da la SSR/SRG. En il rapport annual gist cumpari, er en rumantsch, sa fatschenta il president da l'istanza, Roger Blum, cun la critica ch'è vegnida fatga a l'UBI da Losanna e Berna.

Il posts da mediaziun da radio e televisiun, che precedan l'istanza, han survegnì en il decurs da l'onn passà 237 reclamaziuns – u 34 dapli che l'onn avant. Els han pudì liquidar definitivamain 92% da las dispitas.

Il recurs han pertutgà sulet emissiuns da programs da la SSR: diesch emissiuns da la televisiun SRF e quatter da radio SRF. Cunter RTS (Romania) èsi stà dus, tar radio RTS in e tant tar radio sco televisiun RTS era in. Il pli blers recurs, numnadamain quatter, èn vegnids drizzads cunter l'emissiun televisiva «Rundschau».

Il novs recurs han pertutgà – cun ina excepziun (in spot da reclama) – emissiuns d'infurmaziun. Diversas giadas èn vegnidas crititgadas emissiuns davart cuss. naz. Christoph Mörgele en connex cun sia rolla da giuditgar davart dissertaziuns. Il rapports, apparentamain unilaterals davart il conflict en il Proxim Orient – cunter Israel – han era chaschunà divers recurs.

Dus cas han violà la concessiun

Tar dus cas ha l'istanza constatà ina violaziun da la concessiun. L'onn avant era i quatter. Ina contribuziun da Telebärn, cunter la quala igl è vegnì

recurri 2012, ha l'istanza giuditgà sco na objectiva. Igl è i en questa contribuziun per ina interpresa bernaisa dal Seeland ch'era finanzialmain en las stretgas. La tesa d'in bancrut da la redacziun sa basava sin documents na suffizients, quai ch'il public n'ha dentant betg pudì savair. Las mesiras che Telebärn ha prendì – cun scolaziun interna e stizzar la contribuziun ord l'archiv electronic – bastan a l'istanza per sistir la procedura. Tar l'emissiun «Arena» da la Televisiun Svizra davart l'iniziativa federala «Per ina entrada nuncundiziunada da basa» è l'istanza era vegnida a la conclusiun ch'il cumond d'esser objectiv na saja betg vegnì observà. Cunter questa decisiun ha la SSR recurri al tribunal federal che ha dentant annullà la sentenza da l'istanza.

Respundi a la critica

En la prefaziun dal rapport annual s'exprima il parsura da l'istanza, Roger Blum, davart la critica dal tribunal federal e dal parlament da Berna visavi l'istanza. Il president constatescha da prender tut quai serius che vegnia da Losanna, siond la dretgira federala instituzionalmain l'istanza surordinada, fertant ch'ella punctuescha sia independenza visavi la critica politica dal parlament.

Ina cumissiun extraparlamentara

L'istanza (UBI) è ina cumissiun extraparlamentara da la confederaziun. Ella consista da nov commembers en uffizi accessori. Sin in recurs inoltrà ha ella da constatar schebain las emissiuns da radio e televisiun han cunterfatg tras lur cuntegn redacziunal al cumond d'esser objectiv u sch'igl è vegnì



Sin stadaira: Tribunal federal (TF) e l'istanza (UBI) – pervia da la critica. MAD

refusà cunter dretg l'access al program. L'istanza deliberescha da princip publicamain sias fatschentas e la procedura è gratuita per ils pertutgads.

Midada en la represchentanza rumantscha

Mariangela Wallimann-Bornatico ha demessiunà sin la fin da settember 2013 sco commembra da l'istanza suenter avair appartegnì a quella tschintg onns. L'anteriura secretaria generala dall'assemblea federala è fitg occupada sco presidenta da la Caritas svizra. Sco ses successur ha il cussegel federal elegì l'advocat e deputà Vincent Augustin, Cuir/Mon.